



Inatsisartunut Ilaasortaq Anthon Frederiksen, Partii Naleraq

§ 37 naapertorlugu apequtit 3. november 2015-imeersut akineqarnerat

Apeqqutinut ineqarnermut ilaqtariinnermullu tunngassuteqartunut nassiunneqartunut qujanaq.

Apeqqutigineqartut akineqarnissaannut paasissutissanik Ineqarnermut, Sanaartornermut Attaveqarnermullu Naalakkersuisoqarfimmut piniartoqarsimavoq.

1. Meeqqanut inuusuttuaqqanullu angerlarsimaffiup avataanut inissinneqartussanut, angerlarsimaffimmut inissiivigineqartussamut suut piumasaqaataappat?

Meeqqanut inuusuttunullu paaqqinnittarfiit inatsisitigut piumasaqaatinik arlalinnik paaqqinnittarfimmik ingerlatsinissamut naammassineqaqqaartussanik piumaffigineqartarput. Tamakku meeqqanik inuusuttunillu ikiorsiisarneq pillugu inatsisartut peqqussutaanni takuneqarsinnaapput.

Ulloq unnuarlu paaqqinnittarfinnut imminut ingerlattunut tunngatillugu paaqqinnittarfinnut ataasiakkaanut Naalakkersuisut (Ilaqtariinnermut, Naligiissitaanermut Isumaginninnermullu Naalakkersuisoqarfik) ingerlatsinissamik isumaqatigiissusiortarput. Ingerlatsinissamik isumaqatigiissummi paaqqinnittarfiup aningaasaqarnikkut tunngavissai ilaatigut taaneqarput. Ingerlatsinissamik isumaqatigiissusiortoqartinnagu paaqqinnittarfik taamaatumik qinnuteqaqqaassaaq. Ingerlatsinissamik isumaqatigiissutissamut qinnuteqarnermi piumasaqaatit arlaqartut naammassineqaqqaartussaapput. Tamakku erseqqinnerusumik uani takuneqarsinnaapput: www.uupi.gl.

Naalakkersuisut (Ilaqtariinnermut, Naligiissitaanermut Isumaginninnermullu Naalakkersuisoqarfik) paaqqinnittarfinnik nakkutilliisuupput, tamatumanilu paaqqinnittarfiit inatsisartut atuuttunut malinninersut kiisalu ingerlatsinissamik isumaqatigiissummi tunngaviusunik eqqortitsinersut malinnaaffiginissaat siunertaavoq.

2. Angerlarsimaffik meeqqanut inuusuttuaqqanullu inissiiviususaaq sulisoqarnikut, ilinniagaqarsimassutsikkut, oqaatsitigut, kulturikkullu qanoq piumasaqaateqarfigineqarpa?

Paaqqinnittarfiit ataasiakkaat sulisussatik suliassamik isumaginnissinnaasutut isumaqarfigisatik atorfinitsittarpaat. Sulisut atorfininniarunik piumasaqaatit tunngaviusut arlallit tamarmiullutik naammasseqaqqaartariaqarpaat. Tassanilu assersuutaasinnaapput meeqqanik pinerliisimannginnermut uppersaait aamma pinerluttuliorsimannginnermut uppersaait. Sulisut aamma nipangiussisussaaitaapput, malittarisassanillu attuumassuteqartunik malinnittussaallutik, soorlu ilaatigut pissaanermik atuisinnaanermut inatsisartut malittarisassanik.

Paaqqinnittarfiit ataasiakkaat sulisunut najoqqutassaliussallutik aamma periarfissaqarput, taakkunanilu paaqqinnittarfinni sulisut tunngavissaat erseqqissarneqarput.

3. Piumasaqaatit assigiinngitsut qanoq eqquutsinneqarnerisut pillugit nakkutillisoqartarpa?

03-12-2015
Suliap nr. 2015 - 14916
Allak. nr. 1500403

Postboks 260
3900 Nuuk
Oqarasuaat (+299) 34 50 00
All (+299) 34 66 66
E-mail: inin@nanoq.gl
www.naalakkersuisut.gl

Naalackersuisut (Ilaqutariinnermut, Naligiissitaanermut Isumaginninnermullu Naalackersuisoqarfik) tamanna pillugu piumasaqaatit atuuttut naapertorlugit nakkutilliinermik ingerlatsipput.

4. Aningaasaliissutit qanoq atorneqarneri pillugit qanoq piumasaqaateqartoqartarpa ?

Paaqqinnittarfiit ataasiakkaarlutik aningaasaliissutinik immikkoortitsisoqarnerani siunertarineqartumut naapertuuttumik aningaasanik atuisussaataapput.

Ulloq unnuarlu paaqqinnittarfinnut Namminersorlutik Oqartussanit pigineqartunut tunngatillugu aningaasanut inatsimmi konto pingarneq 30.10.37 atorlugu aningaasatigut tunngavissat aalajangersarneqarput. Ulloq unnuarlu paaqqinnittarfinnut kommuninit pigineqartunut tunngatillugu aningaasatigut tunngavissat kommuninit pineqartunit aalajangersarneqartarput. Ulloq unnuarlu paaqqinnittarfinnut imminut pigisunut tunngatillugu aningaasat ingerlatsinermut isumaqatigiisummi tunngaviliunneqartut iluini aalajangersarneqarput.

Ilaqutariinnermut, Naligiissitaanermut Isumaginninnermullu Naalackersuisoqarfik paaqqinnittarfinnik tamanik aningaasaqarnerup tungaatigut nakkutiginnissalluni inatsisitigut pisussaaffeqarpoq.

5. Meeqqat inuusuttuaqqallu angerlarsimaffiup avataanut inissinneqarsimasut pillugit nakkutilliineq taakkualu qanoq ineriartortitaanerat/perorsarneqarnerat pillugit qanoq malinnaavigineqarpat ?

Kommunit meeqqanut inuusuttunullu angerlarsimaffiup avataanut inissinneqarsimasunut ataasiakkaanut tunngatillugu iliuusissatut pilersaarutit suliarinissaannik, taakkualu mising-sortarnissaannik pisussaaffeqarput.

Aammattaaq ulloq unnuarlu paaqqinnittarfiit meeqqanut inissinneqarsimasunut arlaatigut iliuseqarnissamut pilersaarutinik suliaqassallutik pisussaaffeqarput, taakkualu kommuninut nassiullugit.

Kommuninilu sulianik ingerlatsisut soorlu nakkutilliinerup nalaani meeqqat inuusuttullu ineriartornerannik peroriartorneranillu malinnaasussaapput.

6. Ilaqutariit angerlarsimaffimmiit anisitaasussanngortut meerartaqarsimappata, meeqqap angerlarsimaffeqartuaannarnissaa qulakkeerniarlugu Naalackersuisut qanoq iliuseqartarpat ?

Inissiat attartortittakkat Namminersorlutik Oqartussanit pigineqartut ingerlanneqarnerat A/S Inissiatileqatigiiffik INI-mit (INI) aqunneqarpoq. INI-p inissianik aqutsineq Inissianik attartortitsisarneq pillugu Inatsisartut peqqussutaanni nr. 2, 12. maj 2005-imeersumi maleruagassat malillugit isumagisaraa (Inissianik attartortitsisarneq pillugu Inatsisartut peqqussutaat).

Soorlu siusinnerusukku § 37 naapertorlugu apeqqutinut akissuteqartarnerni nassuiarneqarsimasooq attartortunik anisitsisoqassatillugu INI-p aalajangersimasumik periuseqartarnera nassuiarneqareersimavoq. Periuserineqartartut tamakku anisitsinissanik kommunit paasitinneqartarnerannik kinguneqartarput. Taamaaliornikkut kommunit inunik isumaginninnermik akisussaasutut isumaginnittoqarfimmut malittarisassat malillugit

pisariaqartitaminnik iliuuseqarsinnaatitaapput - soorlu ilaqutariit ikiorserneqarnissamik tunineqarsinnaanersut naliliiffigalugit.

Ataatsimut isigalugu oqaatigineqassaaq attartortoq inissiamik attartukkaminut ineqarnermut akiliutinik akiliinissaminut pisussaaffeqarmat. Attartortoq ineqarnermut akiliutinik akiliineq ajorsimappat kommunip nalilersinnaavaa attartortup pisortanit ikiorsiissutinik tunineqarnissamik piumasarineqartunik naammassinnissimanersoq. Attartortoq aningaasarsialittut, taamaalillunilu ineqarnermut akiliutinut akiliisinnaasutut kommunimit nalilerneqarpat, attartortoq pisortanit ikiorsiissutinik tunineqarsinnaassanngilaq.

Ilanngullugulu malugeqquneqarpoq inunnik isumaginninnermi inatsisini inissiamik tunineqarsinnaanermut aalajangersakkanik ersittoqanngimmat. Kommunilli innuttaasunik angerlarsimaffeeruttunik arlaatigut pilersuinissamut ikiorsiinissamullu periarfissaqarput, soorlu pisortanit ikiorsiissutit aqutigalugit.

7. Apeqqut 6-imut atatillugu, meeqqat inuusuttuaqqallu angerlarsimaffeqartuannarnissaat qulakkeerniarlugu, suut Naalakkersuisuniit piumasaqaataappat ?

Naalakkersuisut inuit ajunngitsunik najugaqartinnissaat qulakkeerniarlugu inissianik attartortittakkanik pisortanit namminersortuniillu pigineqartunik naammattunik peqartuarnissaa suliniuteqartuarnermikkut qulakkeerniarsaraat. Al 2015-imi inissiat tamarmiusut iluarsaaneqarnissaannut aningaasanik ikigisassaannngitsunik immikkoortitsisoqarsimavoq, taamaaliornikkut Namminersorlutik Oqartussat inissiaataat paarilluarneqarniassamata ukiunilu amerlanerusuni atorsinnaaniassammata. Sanaartortitseriaaseq 20/20/60 malillugu sanaartornissamut piginneqatigiillunilu inissialiortiternissamut taarsigassarsititsisoqartarpoq, tamannalu aqutigalugu inissianik amerlanernik neqeroorsinnaaneq anguniarlugu. Soorluttaaq Inissianik attartortitsisarneq pillugu Inatsisartut peqqussutaat malillugu inissianik isumaginninnermut atorneqarsinnaasunik immikkoortitsisoqarnissaanut periarfissaqartoq.

Taamaaliornikkut piumasarineqartut aalajangersimasut malillugit inoqutigiit isumaginninnermut atorneqartumik inissiamik tunineqarsinnaanersut kommunimit naliliiffigineqarsinnaavoq.

8. Angajoqqaat meerartallit inigisaminniit anisitaasussanngortillugit imaluunniit anisitaasimatillugit kommunit Naalakkersuisunut ilisimatitsisussaataappaat ?

Akissut: Naalakkersuisut anisitsisarnerit - pingaartumik ilaqutariinnik anisitsisarnerit – isiginngitsuusaanngilaat, anisitsisoqarsimatillugulu isumaginninnikkut ajornartorsiutinik pilersoaqartarnera maluginiartuarlugu.

Kommunilli ilaqutariinnik meerartalinnik anisitaasussanngortoqartillugu Naalakkersuisunut ilisimatitsissallutik pisussaaffeqanngillat.

Inussiarnersumik inuulluaqqusillunga

Martha Lund Olsen